

黃  
檗  
山  
寺  
志

黃檗山寺志卷五

塔十座

蓋佛之示現咸以三乘正法而利羣機涅槃之後皆以寶塔而藏舍利凡一瞻一禮亟成佛道故象教之設詎可少哉曰佛塔菩薩塔羅漢塔聲聞塔祖師塔各有層級等差惟海會耆宿諸塔壘石而成則曰卯塔每見水滌鶴之徒一時福緣湊合妄造層級以混佛祖未免爲識者哂

其僭竊可知矣本山附近諸塔皆非祖塔獨鴻  
休大休二高僧未詳法嗣而其塔湮沒無存於  
戲毀之沒之其罪福又何如也僅崇禎辛巳歲  
造本山說法費和尚壽塔一座係臨濟正傳三  
十一世乃茲山祖塔之始大丈夫足下具眼或  
瞻或禮豈可不辨緇素也哉

唐

鴻休禪師塔

舊傳在天柱峰昔人有贊云日出栽松日入宴寂  
至今山中鬱鬱客客白日春風了無塵迹山雲海

月兩忘形千古寒潭照虛室所載高僧傳今遍覽  
無踪或年代深遠爲土所平不可知也師亦贊云  
不爽宿債端坐青松頭臨白刃如斬春風唳七粒  
瑩然揮不破至今洞壑猶玲瓏  
明

### 大休禪師塔

舊傳在幢幡峰西前有塔院基址頗鉅石柱數條  
石人望柱各二列于甬道爲國初所賜葬者今亦  
無跡萬曆間山鄰欲圖爲墳寺僧徹夜以石砌之  
名爲大休墓次日謀者乃息師贊之曰興隆家國

妙在休心龍雲際會  
覬芥投針莖草不枯  
今建創已竟一葉未落  
今滿地黃金

雪堂塔

在桑池園中塔基禁五畝前里長陳大綬冊據

蒙菴達和尚塔

在雪堂塔右

妙湛塔

在雪堂塔左

坦翁叅塔

在雪堂塔前爲山鄰所廢今僅存三塔一列俱名

雙池園師有感云三塔魂消愁砥柱雙池水涸待

金湯

藤菴暉塔

在下棋塢宅左

適軒友塔

在藤菴塔左亦爲山隣所廢辛卯春重修改名曰

上善塔

圓湛師塔

在吉祥峰下

必翁友塔

在熨斗山萬松巷之後甲申冬玄密禪師附葬于此其餘諸塔附寺左右歷代住僧瘞焉天柱峰下壽塔之上有塔四座曰正覺慈覺山堂埤海癸未歲乃合爲一勒石以便祭掃又方丈右塔二座一荆巖一失名又寺左山一帶塔三座曰純極曰總巷一失名

賜紫中天師祖塔

在四潭之上建自天啓壬戌仲冬坐辛向乙癸祖自大帽踴躍而下突起寶峰中抽嫩枝數節後方結穴紫薇屏嶂輔于左五雲報雨弼于右獅子馴

伏其前寶蓋輝煌于後倉庫叠叠朝崇重重靈淵  
鍾氣獅象臨門賜紫老人任之不亦宜乎

費隱容大師壽塔

在舊輪藏之後建自崇禎辛巳孟夏發脉由羅漢  
峰轉天柱巍峩而下坐亥向巳羣巒環繞龍虎重  
交前案卓立後峰插漢誠天然一座福地也偈曰  
含冤未雪久成胎活捉空王特地埋不是渠儂誇  
好手都緣幫惡劈頭來

海會塔

在寺龍臂前崙丙子冬僧良聰重修塔中題淳熙





間 禪師歸寂有猿鹿悲鳴羣鳥獻花之句丁  
亥歲常熙蒼舊捐資重修局面嚴振規模壯海會  
之大觀收羣峰之嘉氣請師說偈偈口翠竹林中  
無縫塔百千舍利現其中大悲同體雖非別殊勝  
莊嚴在爾躬

報恩塔

在鬘斗山萬松菴之左辛巳夏諸耆舊同本山和  
尚共捐衣資三十金以克常住葬諸佛母名曰報  
恩有碑一座菴中祀牌位春秋祭掃用昭報本之  
道偈曰人生大本重丘山未報劬勞暗淚潛忽悟

萬靈共一體雙親頓證刹那間

黃檗山寺志卷六

住持隱元琦重修

門弟子性幽編閱

外護序 啓

蓋聞知賢者難擇賢者不易而其護賢者又難  
於知擇也而况永護教外別傳之正法乎然則  
能知而不能擇則所知奚益焉能擇而不能護  
則所擇又奚益焉若惟能護而不能知擇縱然  
幻起琳宮糾殿遍滿娑婆羣居勞侶百千萬指  
成魔外法徒益其勞曷有補于正法護乎所謂

知擇護三者缺一不可也三者全備則茲山也  
靈鷲也千古儼然一會與金湯正眼並傳永久  
而無窮者矣

序十五則

重興黃檗募緣序

葉向高

黃檗爲宇內名山梁江淹嘗有題咏如陽岫飛鸞彩  
陰溪噴龍泉鳥鳴丹壁上猿嘯清虛間人傳誦之寺  
宇宏麗高僧輩出自唐以來稱大道場嘉靖間燬于  
野火僧正圓募緣小院于舊址之後復重繭走京師  
請義竟無由達淹留八年卒死長安中人莫不哀憐

之其孫興慈興壽等欲成其志時余在政地日來祈  
恨余亦不能爲力也甲寅秋 皇上以 聖母升遐  
思慕不置廣爲祈福擇名山古剎分置藏經海內共  
六處而黃檗在其中 命中官王舉齋送給內府金  
錢三百兩爲路費 賜勅俾住僧守護余告中貴之  
掌司禮者此菟山梵宇久廢不足以煩中使者不如  
使僧自齋之爲便司禮云此 聖上孝誠至念且欲  
使人觀彼中山川形勝誰敢阻之余時已得請歸田  
遂先行中貴行至淮爲盜所劫盡亡其金困苦不支  
賴浙中丞劉公給以郵符乃克致命卒事而歸大茲

山自開闢至今不知更幾千萬年始得 聖天子被  
之寵靈不難遣中使發帑金跋涉萬里而來煌煌帝  
命焜耀于重巖深谷之中父老兒童莫不奔走聚觀  
以爲曠古盛事微獨山靈之幸亦吾鄉里之光也而  
祇林鹿苑鞠爲蒿萊貝葉琅函珍藏無所委君命于  
草莽寧非吾邦人之過歟或者謂佛教荒唐儒者所  
闢不宜崇奉不知宇宙間既有此一種道理自不可  
廢以 高皇帝之神聖猶存其說余在留都見其剝  
名田徧滿畿甸皆 高皇帝所給賜也黃檗之爲道  
場已數千年重以 今天子之命可不恭乎而正圓

以區區一老衲欲行其志雖死不悔其孫卒能成之亦足見彼教之有人而天下事苟有必爲之志天亦爲動無終格者顧寺宇之興非獨力所能就余謹書此以告于四方之善信知發心樂助者必多揚寵命而荅山靈將此舉聊盡臣子之道其福田因果彼三藏中彰明較著不待余爲贅矣

禪燈世譜序

黃端伯

昔世尊以正法眼藏囑付迦葉阿難副貳傳化母令斷絕迨至五家分唱而宗風徧滿十方矣然黃檗猶有不道無禪祇是無師之嘆何哉當時臨濟小廝獨

得大機之用慣捋虎鬚盡令而行大地人亡鋒結舌  
去黃檗記以吾宗到汝大興于世雖因緣之相會亦  
作用之迥殊也厥後英靈迭起個個如獅子兒山鬼  
野狐望風奔遁遂使正法眼藏綿歷至今識者所以  
服師傳之妙也曹洞綱宗揀魔辨異其大旨略與臨  
濟同故法道之行與臨濟相終始然自大陽之後授  
子繼之則曹洞亦分源于臨濟矣昔人謂合五百年  
而別別五百年而合倘亦有然者乎乃自宋季以歷  
我明代有英傑而殘編斷簡湮沒于荒榛敗草之中  
後世兒孫欲識名姓而不可得悲夫廬嶽恣公乃天



童大師高弟也廣蒐碑傳敘次成編其自靈山以至  
曹溪則已歷三十三世矣復自曹溪之下以至禹門  
則又歷三十三世矣前後相承若合符節而天童繼  
起于其間則代興者政未艾也天童操一條白棒勘  
驗諸方佛來祖來劈脊便棒縱有神通妙用無處藏  
身臨濟一宗大興于世奇哉始余承事壽昌咨決最  
久然猶恨離師太早未盡其長及再侍大師于天童  
觀其機用而後嘆臨濟之尚存也乃壽昌嘗爲余言  
老僧五十歲行脚印法瑞峰第未詳瑞峰之爲誰子  
耳余閱禪燈世譜瑞峰原與禹門同師則壽昌固臨

濟之嫡血骨也其嗣廩山而嗣曹洞實與授子之事相符日月光明並行不悖故世尊所囑副貳傳化母令斷絕于方來哉

密雲禪師語錄序

黃端伯

達磨受西天般若多羅密印六傳而至曹溪曹溪之後分爲二枝而臨濟之兒孫獨盛蓋監寺受慈明之遙記與二枝而楊岐之兒孫獨盛蓋監寺受慈明之遙記與黃檗之記臨濟正同故禪道獨爲天下冠今之所傳臨濟派者則皆系于圓悟勤之子虎丘隆者也虎丘之子天童華知見高邁大慧嘗作偈特稱之天童華

傳天童傑傑傳破菴先天傳無準範範傳雪巖欽欽  
傳高峰妙妙傳中峰本本傳千巖長長傳萬峰蔚蔚  
傳寶藏持持傳東明岳岳傳海舟慈慈傳寶峰瑄瑄  
傳天竒瑞瑞傳絕學聰聰傳月心寶寶傳禹門傳禹  
門嫡子是爲今天童圓悟大師大師之望前圓悟勤  
公凡二十世其望臨濟則三十世而望達磨則四十  
世也天童居大海之東山川環擁當年之坐道場說  
法者八十餘員大率皆臨濟之裔也庚午之春余在  
武林僧舍獨見大師語錄一編始知臨濟宗風至今  
未墜修書致敬請師說法太白山中卽天童華禪師

故址也棒喝交馳學者無開口處莫不望風而靡以爲臨濟再來也大師操履嚴峻有古尊宿之風行解相應與末世之狂禪迥別余嘗觀其用處縱奪自由每吐一言蓋天蓋地其所從來者異矣應般若多羅之識而中興臨濟之道于今時正令全提坐斷十方世界至矣哉

又

蔡聯璧

達磨西來直指人心見性謂之教外別傳翻盡四十九年葛藤獨拈花一則鋸解不破斧劈不開曷爲密雲老人語錄緇素尺一奉之夷夏圭璋拱之蓋古尊

宿當陽提令各擅勝場有如龍吟虎嘯有如電閃雷轟有如千仞鳳翔有如百川鯨吸有時孤松嶽立有時萬派聲銷非不旗鼓一代俎豆千秋總不如老人曝曝論實單單據本不鋪文彩不通意解直下勦絕案曰斷人命根或與當頭擱攔胸搨或與幕面唾劈奔攖亂體提持未嘗有一法與人每居恒示壁伊問訊時我低頭伊禮拜時我合掌半斤還八兩二五得一十彼自無瘡勿傷之耳老人出世晚年多利人廣自禹門至天童返通玄踞座六大刹金粟稱最盛金粟爲余捨身命處余侍金粟凡七閱春秋迨冬制有

放出一羣猛虎句喜可知已雲初法裔如林如藪振  
濟宗者皆出自金粟卽今費隱和尚繼席弘揚不改  
父道宗門仰之金粟其薪傳地也蓋老人極慈悲是  
極惡辣極惡辣是極慈悲杖頭所指十方貌象航海  
梯山纔動齒牙遐邇兢怖則謂是老人語錄老人何  
有哉費和尚重加攷定法今垂後命壁董較讐因敘  
述如此絕不敢作綺語攢簇雖然塗污不少歲在乙  
酉清和旣望弟子明暹蔡聯璧九頓撰

費隱禪師語錄序

王谷

昔世尊以正法眼藏付囑迦葉祖祖相承以至五家

分唱大闡宗風乃後之繼起者既定其宗派又審其師承源流本末毫不紊淆不啻如世之譜牒也者非過慮也蓋以心傳心之事非宗派分明師承親的則山鬼伎倆野狐機鋒于以奪朱亂雅其害有不可勝言者然在今日且不免焉他不具論卽如號稱出世者有一輩徒銜宗門不明支派厚顏冒托謬曰爲人詰其根源曾無憑據舉世被其誑惑流禍無窮是宗派不明之弊也宗派明矣而離師太早陶鍊未純猶有不循本分節外生枝簣鼓後學以致本師從新救正嗟乎師承之印證未至于親切之地詎可鹵莽以

出世也哉五家宗旨惟臨濟獨得大機之用而後嗣如獅如象迥出常途故臨濟一宗流傳今日不與他宗同其斷絕宗派之獨高天下也如此至天童老人純以棒喝接人臨濟宗旨又大顯于世豈非佛祖付囑爲人天之模範乎費隱大師舍離狂僞獨覓真宗自天童老人付法之後服勤有年龍天推出惟以實證的切一着子接人故其語錄開六知見具大作略全提正令煅煉人天臨濟宗旨重光再振其于天童老人蓋副貳傳化者歟然則今來真實趨向宗門者舍臨濟其又奚適哉抑今來真實趨向臨濟者舍天



童老人法嗣如費隱大師其又奚適哉丁丑仲冬叅  
學弟子山陰王谷穉齒撰

隱元禪師語錄序

唐世濟

人有傑地有靈交重也亦交待也重然後因緣著待  
然後時節顯時哉時哉跂足引領日幾幾于寂滅灰  
冷之場幾何歲月而其人乃一旦起乘之豈偶哉吾  
讀黃檗隱大師語錄而知人地與時之合之非易也  
斷際已前固有黃檗而名未著斷際著黃檗名又以  
其名名所居于是一黃檗現多黃檗而開堂說法者  
非絳節之麓也嗣居聲實並茂者不乏歷千餘年又

非斷際之傳也。今天童老人暨費大師父子接踵迭興斷際之道，乃始大闡而隱大師繼之，堂構再新。黑白奔湊，續祖父之緒于斷際，有光葢絳節之麓山君樹神以及萬靈八部縣望已久，始有今日殊勝耳。地耶人耶時耶三者缺一則勝亦不殊，因緣會合在今日，其致之豈自今日始？茲語錄具在大都，掃除知解，直示根源，如吹毛之劍，點雪之爐，而又句意俱到，如摩尼珠隨現五色，自非牢關穩密路途坦平，踞佛祖頂額，翻衲僧巴鼻，安有如是輝天鑑地、活捉縱橫也哉！嗚呼斷際以雄峰爲父，以渾沱爲子，故能掀揭宇宙。

密爰而蓋昌今大師父子祖孫媲美前哲而又當時  
闢化消息互通更不待重加尋繹始知胡亂後不曾  
少鹽醬也此豈獨一時一地爲希有哉屈指古今丁  
斯盛者蓋不數數源遠流長吾于斯錄見之矣崇禎  
壬午夏仲弟子唐世濟稽首撰

又

王谷

金粟費隱老人爲臨濟三十一傳起未墜之緒續方  
焰之輝十餘年來說法爲人純用本分鉗鎚不落玄  
妙窠臼單傳直指之道乃大著于天下後之接武者  
雖未可限量然而承紹其宗敷揚開廓使單傳直指

之道益顯于天下蓋亦難其人矣隱元禪師首入老  
人之室卽覲體承當全身擔荷掃去支離絕無依倚  
室中得人師爲翹楚矣玄生上人一日持師開堂語  
錄示余余受而讀之見其機用宏達語句淵玄騰踏  
當機掀翻義路總從正脉中發揚展拓所謂單傳直  
指之道益顯者當于師是賴豈復有殊絕難繼之嘆  
哉玄生上人以余推重于師也遂囑余序余聞稱人  
之善者必本其父師德厚之至也矧余亦出老人之  
門忝師之昆季者乎故取茲義而述之使世之向斯  
道者知師爲老人之嫡子且識予言之非佞也是爲

序

隱元禪師又錄序

劉沂春

余嘗讀費隱老人語錄宗風遠振上以接臨濟之緒  
下以開末法之光真傳燈正派而慧日亘天者余服  
膺久之始知爲天童高足宜其聲實之並茂也今隱  
元禪師又爲費老人高足法眼洞明機鋒猛烈一門  
而三關宗旨樹幟禪關誠古今法寶中希覲者飛錫  
回闔首登黃檗開堂說法普照人天而善信之皈依  
諦聽者不啻龍象紛馳鳳麟畢集余按黃檗閩山也  
祖師閩產也昔以黃檗著名至今猶令人溯源嚮往

其爲閩地增重可知憶無異大師以父子而卓錫湧泉今隱元禪師復以父子而賁止黃檗其思所以闡發宗風抑揚三昧者匪一朝夕其爲閩增重益可知也今讀隱元禪師機語迴脫常情頓超物表若以心傳心以水印水所謂佛光朗鑑智炬同輝于茲益信不特斷際之統緒昭明其單提直指之義火傳薪積隱師之功又曷可少乎余鄉龍泉禪林自百丈著名後寥寥其人今隱師棲真于斯宗門丕暢余亦將隱矣行親炙玄光飽聆宏論以遊于方之外偕石點頭未訖也謹題數語以飯之

又

林正昇

龍泉寺距余家二里許古大唐中百丈祖師所建祖  
余鄉產也叅江西馬大師得法後隱于洪州百丈山  
闡單傳直指之宗製禪席清規之訓師于天下而法  
于萬世黃檗運大師寔嗣承焉至我朝有四明太白  
山天童密老人復闡是宗傳之金粟費和尚而隱元  
禪師則金粟入室首座也接派開堂于閩越吳浙之  
邦居恒喜慕百丈家風欲惠賁龍泉春初寺主印虛  
上人出禪師語錄示余余心異之遂僉東往浙迎至  
挹其丰儀道範固有覲面全彰者及再聆棒喝則又

標指見月言下了義環座觀聽者無不豁然領略斯旨也歷夏秋說法之暇穿洞垣闢小築超超玄勝遊其上者咸括目道風真趣旣復出龍泉語錄余得而讀之覺當機直達一指萬彰如日麗空幽暗畢耀如霆破曉聲韻盡性俾單傳直指之宗愈益著明于世斯真百丈重興黃檗復出豈獨爲天童賢孫金粟肖子而已哉余友陳君諱永武者亦讀是錄而讚之曰雪裏陽春點石泉龍歸鉢隱混元天相逢謾說封侯夢且向山中聽法禪余有感因併錄之爲序昔乙酉仲冬長至日玄石居士林正昇薰沐拜題



又

陳遂捷

臨濟一宗古今烜赫不惟嗣者難其人而授者尤不易其人也非吹毛快刃不能斬固執之命根非鎔鑄純金不能範聖凡之面孔苟握柄弗圓徒擊塗毒之鼓以求佛種不斷詎可得乎萬一有似是而非者起而承之是不斷之斷也烏乎可黃檗自斷際以後幾若綫矣歷千餘年始有密雲費隱二老人登其堂發其藏提出無孔鎚轟轟烈烈殺活縱橫起風雷之令掣電卷之機庶滓沱正脉流通萬古使無根亂統野狐精魅無地逃竄矣幸有隱元禪師繼起斯宗中興

黃檗拈花微笑一會儼然筵無退席之侶閣有彈指之童鳥道非玄空山奚寂余私心嚮慕固已久矣中秋涉勝仙溪因爲頂禮香潭探其胸懷尼健波旬而不拒閱其語錄鏡花水月以同圓蓋惟自悟無言故能掃人有言亦惟不襲陳語故能破人囁語墨痕皆捧印水無泥昔日之風雷欲借今朝之鱗甲自威頂髻一珠三世環弄無老少之嫌無似是之間斷臂以來未有盛于斯也竊怪後代兒孫不丈夫承虛接響太狼藉或狂或狷或模糊愈掃愈多愈不息余讀斯語知老和尚日在揚眉中从口息于踵矣請問狂者

猶者試味斯錄以爲何如

隱元禪師雲濤集序

唐顯悅

詩有近于禪而不可以禪名禪有寓于詩而不可以詩名也余讀晉惠遠諸公詩愛其詩而不着于禪也閱古諸名宿倡愛其禪而不屑于詩也雖然此猶分言之也獨不有亦禪亦詩非禪非詩者乎黃檗隱元和尚今之斷際也中秋遊我仙邑從遊如雲瞻禮如岳余慚非裴居士曷敢謬附唱和緣閱其語錄觀之觸機縱橫批竅揮灑已知老和尚胸中磊落品調不凡也嗣是門下高足果以雲濤集示余展卷微吟雲

濤滿眼夫雲觸于石大則爲雨爲霖濤怒于海小則  
爲松爲茶雲有影而無聲濤有聲而無影大小有無  
各相變幻取以名集又知和尚不自謂詩也蓋雲見  
爲雲則無聲雲不見爲雲則有聲矣濤聞爲濤則無  
影濤不聞爲濤則有影矣謂濤非雲也可謂濤亦雲  
也可謂雲非濤也可謂雲亦濤也可聲影皆塵見聞  
胥幻雲濤自有詩詩自有雲濤諸人無以眼耳求之  
則雲濤之詩甫變幻於方寸卽徧覆于三千大千矣  
余且不得以禪名又安得以詩名惟頂禮唱嘆而爲  
之序

又

林 峭

夫山之峭壁奇崖未必高也水之狂湍奔急未必深也非不高深而高深可測也大抵至平至淺之中一涉至人舉止隨其可喜可怒可驚可愕可殺可活可經可權放之神鬼莫測收之古今無跡聖勿辨也凡勿殊也內勿移也外勿混也詩之一道至今日失統極矣辭客騁其賦情縹流耽于虛寂淵源一錯徑路盡差亦猶宗門喪其指歸入于魔祟雖終日登壇論說直是盲引羣盲蹈于火坑所必不免耳隱大師爲天人標榜接曹溪之嫡派振臨濟之正宗沙界三千

莫不知有黃檗老人也夫奚藉于詩奚藉于詩傳不  
傳黃檗老人何待其取材于晉魏乎其襲貌于宋唐  
乎冲口所發滿紙皆珍應手所指點頭是石則凡日  
也月也山也川也草也木也禽也魚也花也鳥也述  
不盡述觸不勝觸總是緣衣蒼狗寒泉怒瀑變幻離  
奇舒卷無際和尚自謂是詩也非詩耶媚非詩人也  
非禪人也非知詩知禪也拜讀宗語示列法座炎想  
悉捐清虛徐來真覺十二峰葱葱隆隆包羅萬有而  
詩特其一班耳自今願披髮入山請從沙彌後捧硯  
濡墨供黃檗老人詩囊一抹

本山冊籍序

劉以修

黃檗淨業名區宗風丕振法雨洪沾代有跣趺掩關  
時或宣朗提揭霧卷崕青雲移松秀結半日僧緣坐  
臥惟聞天籟耳可恠鄙人好爭不第爭于人也直與  
神爭山水竹木擱然踞之不大可異哉夫一聲清磬  
半夜蒲團全賴此聳霄挿漢者壯麗觀瞻護培形勝  
而維摩不能保其屏嶂山靈不能守其鬱葱爲問本  
山護法亦惴惴暴客耶佛法廣大一任天高鳥飛密  
諦因緣且看永落石出試正告之曰鴈過長空影落  
寒水大地原無實相普天下黑漆漢盡登光明覺路

可也時崇禎甲申春日閬苑九一劉以修識

又

凌世韶

都會名勝之區凡古道場及淨業好修者例得標表  
蠲免其租役良以攘攘世界中稍存淨業片地風美  
爲多也況正法眼藏祖印燈傳如黃檗禪林者乎而  
閩中寺租不惟蠲恩特少且往往受科派強蝕之苦  
倍甚此誰之責余不免逡巡愧懷矣維山有靈不思  
培成善業而徒挾私任詐以越牟爲利豈遂儕于天  
道並蔑王章乎其著籍法守焉可也

又

周

吉  
心  
公



黃檗名山也寺亦天下名寺創于唐盛于宋湮衰于元其重剏則明初大休禪師也時吉祖心鑑公與師道企志合捐資數萬運海而至復成巨觀基址棟宇視前較爲宏拓前後百餘畝香燈田皆吾祖恢圖三歲兒童咸克道之迄壬戌倭變則劫爲之也迨後近隣霸吞產空僧遁是則人鬼爲帝也夫劫值則廢旣過仍興此天道往復恒數無足深恠獨至人鬼爲帝認一時之漚花爲萬世之基業旣久假而不歸以禪門苦空欲與豺狼角鬪反所侵地能乎不能乎甲寅歲中天禪師不憚跋涉叩請藏經制曰可時主持則

有相國葉公執法呵護則有邑侯汪公協力董成則有附隣林氏并善信諸君子適隱元禪師又自金粟歸主席斯山上宇下殿漸次恢闢所云往復恒數千斯可見矣吉上京謁選過拜固竊喜祖緒藉以不朽因閱冊細諮山前後舊址所復僅三之一十二峰尚失其二香燈田被奪尚十有八九心又甚痛之嗟乎予寺以有而克有嘗聞之矣未聞奪寺之有而永克有者也夫聖天子賜藏之所可終乾沒乎諸禪師暨吾祖之英靈竟遂冥冥乎竊恐人鬼爲帝亦將與劫同盡爲往復之恒而已謹志之俟後

啓計則

請密雲禪師住黃檗

葉益菴

蓋聞古佛願弘駕慧輪於覺海老婆心切擲化土於  
凡區是以去住無常四大皆成梵界因緣有地一燈  
足照昏衢出世度生爲山作主恭惟座下雉雲表氣  
金日垂祥道行孤高紹禹門之法眼機鋒暇整暢臨  
濟之宗風天台山頂行翻却無明公案金粟峰頭坐  
拈來不二法門擅震旦之名流信叢林之尊宿聲特  
垂于閩嶺化已普于吳天願茲黃檗遺基寔乃興賢  
騰蹟自斷際飛錫以來宗規未泯洎神皇賜經而

後法席高懸雖龍蟒雜居猶勞神足矧聖凡共證倍  
想明珠千峰明月半溪霞也道爲家何處三個木毬  
一枝箭不妨作戲逢場蕃等素仰玄風遙沾法雨欽  
三緣而作禮偕四衆而陳情所冀覩座遙臨湧慧泉  
而轉法龍天高擁現滿月以揚音庶衆生各各離塵  
身似菩提心似鏡得松下時時問道雲在青天水在  
瓶咸啓金繩仝登寶筏謹啓

又

諸士紳

伏以西竺開場愍人天之長寐東蘆特渡喜震旦之  
將明慧月從昔而普臨慈風于今而仰被恭遇密雲

大師和尚初心正覺特地玄風磨斲手眼靈光立現  
于當前看箭風聲轉機旋撥于指下誠空門之正印  
禪籍之宗工者也顧茲苦海無涯念彼愛河曷濟非  
有祕魔之又孰指曹溪之鉢是厝啓檠山之道場特  
走延金粟之法駕雖幻漚亂起水體幾蕩乎中流而  
猛談欲灰火性長存于陽燄矧象踏之處寧有野狐  
想駿鞭之施皆成良馬自可登筏不戀筏無復騎牛  
而覓牛千點祖燈重聯斯室一花聖葉再拂當天某  
等慚窮經之蠹全鑽紙之蜂有懷折弓未能置劍喜  
觀座中法主敢云客是陀仙敬三薰以致緘偕四衆

而延佇伏願拈花笑指示再出之白椎飛錫遙臨現  
後身之黃檗庶人人自獲乎大寶念念各覓其神珠  
鹿渴可消兒啼聊止臨啓可勝翹企

請費隱禪師住黃檗寺

緇素僉具

伏以獅王弗吼祖佛困于稿灰野干亂鳴生靈陷于  
鬼窟客路猶然悲愴婆心寧不怔營恭聞和尚法戰  
諸方翻却千年骨董機投密室贏得一味平常毳毳  
破袈裟搭着通身是眼現成鐵柳栗拈來活潑如龍  
何妨帶水拖泥隨處撐天拄地某等翹勤永日竚想  
終朝所冀神足雲騰卽擁娘生處所慈容滿月常放

本地風光燦燦迷途咸成正覺玉融城裏奇峰怪石  
也生輝黃檗山中翠竹名花增錦繡一會儼然不勝  
慶幸之至

又

林朝龍

生朝龍幼不聞道老未歸禪自分句下之鈍根總屬  
門外之漢子側聞老師明心見性無不舍筏渡津堅  
義標宗輒爾登峰造極此固望衣鉢而自失且欲聆  
祕密而末繇者也惟茲黃檗卽古道場自權教不遇  
夫真人致宗風幾墜于今日何幸同發宏願而哀懇  
賁臨喜福唐之慈雲復布惟祈垂憐衆志而特加接

引知黃檗之慧照重光不盡歡忻可勝翹企

又

薛秉鉉

宇內名山必得名人飛錫而地因人重矧祖師道場  
爲人天瞻仰其關係不小非有遠公衣鉢豈易任耶  
恭惟老師心包太虛量廓沙界大乘妙解胸中法華  
獨叅意表誠吾邑之真人佛門之嫡嗣也不佞昔遊  
黃檗曾挹清光茲因本寺大衆欲振昔日宗風非藉  
有道行兼全圓覺獨露如老師者六龍必不繞座百  
鳥必不啣花而山靈亦無色矣故此段機緣委難孟  
浪合縣善信僉具虔衷特請老師住持黃檗總領道



場故議不佞敬裁八行用伸九頓萬祈象駕惠然至  
止庶法雨時洒萬彙之焦枯受榮慧日長光衆生之  
永夜蒙曉其爲桑梓之地造福功德豈能名言哉臨  
啓神馳可任翹企踴躍之至

請隱元禪師住黃檗寺

林汝翥

伏以黃葉紛飛假東蘆而正覺白椎不示迷西竺以  
昏衢誰爲出世之人以作度生之主婆心咸切兒啼  
共懸恭惟和尚豎光明幢秉金剛劍禪律並至播曹  
溪之宗風行解互高紹斷際之嫡派開猛焰之路設  
狂瀾之桴顧此檠山宿稱聖窟前乎此者天童密雲

和尚法駕遙臨野狐因而絕跡誰其嗣之座元費隱  
和尚法棒繼振異獸益以遁形祖鉢相傳佛燈長照  
曠千百世之勝會誠億萬劫之良緣雖祖祖無一法  
以示人而師師實此心以相付念茲玄風旣遠鑽窓  
之癡固多虞彼正印不繩戀筏之習不淺生有懷手  
眼素注宗規是用特使布誠實以四衆共懇所祈遙  
施駿鞭之影枉現聖箭之聲果結于神州緣開于此  
土以一炬燃百千燈明明無盡以千燈照一大室灼  
灼無邊縑流幸甚士紳幸甚謹啓

請隱元禪師圓黃檗

諸士紳

恭惟和尚慧覺宗工真如正印緣結大千法界具圓  
明寂炤之根道開不二法門超語言文字之障磨蕪  
手眼靈光徧現塵寰看箭機緣風聲特垂闔海真禪  
林之尊宿震旦之名流者也某等向挹清光風欽道  
範茲爲和尚慈筏遊東遂使斷際法筵虛左在七年  
椿喝固知教澤長存而一脉家傳尚望宗風繼振謹  
合羣心而延佇先投五體以抒誠伏願錫杖遙臨現  
後身之黃檗金繩密啓示再出之白椎嫡派總行之  
天童祖作模而孫作範法乳均受于金粟伯吹埴而  
仲吹篪千峰明月半溪霞燈燈相禪三個木毬一枝

箭筏筏同登盥手具箋凝眸候駕謹啓

又

陳從教

別久渴欲一晤瞻拜擬在秋冬不謂亘和尚之意只在芙蓉羅山其來黃檗也亦勉強應一時之請而已今見法乘回閩遂堅意推讓似亦不能強畱之者念龍泉菴爾舊雖祖師出身之所非開堂說法之地今老禪師道德日高信從日衆恐此不足以容之幸卽命駕還山以慰輿望以廣朋從萬勿久淹令祖山寂寂無色也而晤在卽未悉願言

又

夏春暉

達師一載閱變兩都亘古以來禍亂未有若斯之速者也揆厥所由皆因人事豈緣天數然及今尚未有定筭來有國有家旣已長慮卽禪林恐亦不得安也奈何奈何黃檗山仗大師福德振起擴清數年以來神皇之典冊倍光佛祖之法道重朗不肖以皈依獲免世劫想亦宿根宿緣不至墮落還望和尚提點至于山隣鼠輩大貪大痴不久銷耗磨滅無容分介也亘和尚有書催不肖請師歸主黃檗詞意殷勤迫切共事鄉紳縉素咸祈賁來况大師念念不忘神宗佛祖夢寐嘗在十二峰間應徇衆願乞示歸期以便趨

迎不肖日前上省朝賀取道坑田因全行相促不能  
造寺樞謁愧甚歎甚祇念前偈語當面談耳容晤敘  
不一

又

林啓芬

黃檗祖席得天童金粟二老人大振宗風而區內野  
狐聆獅子之鳴靡不潛踪數年來蒙和尚繼美扇厥  
真宗乃古德之罕儷後昆之模範也近旦和尚退席  
之書極爲懇至而難兄難弟復相推賢法席不可久  
虛目今東南緇素無不瞻仰道風懇祈命駕賁止庶  
中外得所皈依山門永藉庥庇肅此崙請可勝翹注

之至

請巨信禪師住黃檗

陳從教

伏以黃檗爲宇內名山神皇賜藏法席稱邑中勝地  
賢相布金高僧崛起從先達士並臻歸仰重興數代  
備暢玄風繼踵多年益彰慧日恭惟和尚道尊海岳  
德播寰區升堦自萬福堂前入室出羣英首選密移  
一步且從父母之邦細看諸峰盡屬祖宗之址接續  
應宜正派住持貴在得人某力愧金湯願叢林之有  
賴才非砥柱期禪苑以無虞敬肅鴻音敢攀猊座所  
冀拈提白棒宏開臨濟之門激發初機不墜野狐之

竊庶使含靈慶幸普令沙界沾恩臨草廻惶不勝翹

企謹啓



黃檗山寺志卷七

住持隱元琦重修

門弟子性幽編閱

文志 記 詞 賦 贊 詩 偈

一畫未彰大文已著蝌蚪龜龍毋乃藻繪之遺  
乎非也天不以色蒼而晦日月地不以質厚而  
厭山河人亦不以詞達而少美麗自古迄今名  
公韻士得之篇什居多故雖時變代遷魚魯莫  
辨千百世後猶有于殘篇斷簡之餘撫其實而  
知其事誦其章而想見其人者甚美文之不可

以已也題稽厥志爰彙成帙夫是之謂無文夫是之謂至文

志一則

福清縣志

黃檗山在清遠里以山多產黃檗故名林巒重複爲邑之勝梁江淹嘗遊此有詩陽岫飛鸞彩陰溪噴龍泉禽鳴丹壁上猿嘯青崖間上有珠簾泉下有瀑布泉垂數十丈其勢甚健淙崖石爲穴下濬無底潭口徑八九尺舊傳有龍禱雨輒應上絕嶮處復有一潭人跡罕到龍嘗自下潭移上潭所歷有爪跡又有佛

座峰香爐峰寶峰紫薇峰屏幃峰天柱峰獅子峰羅漢峰鉢盂峰五雲峰吉祥峰報雨峰宋陳確詩峭拔藏蒼龍烟雲晝長鎖天際雨將來山靈已先報山有黃檗寺寺之西有嵩頭陀巖至今猶有乳香出石罅問

記一則

遊黃檗山記

明吳鍾巒

黃檗山寺福唐叢林之最著者也歲丙戌余避地來黃檗在耳以道忝弗克至也丁亥移寓逕江黃檗在日以溽暑弗卽至也七月之望始至焉同林氏二友

踰陵涉溪境漸以深可十餘里數折至山山數折至  
寺寺在翠微松竹森蔚望之已居然勝境矣入寺羣  
峰廻合梵宇莊嚴爲寶殿爲轉輪藏爲香積厨爲僧  
衆寮結構都備殿後歷數十級而上上爲法堂爲方  
丈爲客堂堂中有葉文忠公像臨高望遠心目敞豁  
遂棲宿堂左二友談山有九潭一潭最勝余興勃勃  
明日陰雨雨不止又弗卽至也雨窓無事俯仰懷擁  
見文忠公遊絕頂詩嘆曰公太平宰相也公罷相後  
璫禍矣公捐館後今日矣昔之遊者非今日之遊者  
也因步韻爲詩以寄感慨越日雨稍霽余曰盍行乎

二友曰行趾石水隱石未可也又越日王子同余季子至今先觀焉還報曰可矣石出矣草隱徑又越日僧爲拔道而後行行上從山至塔菴菴靜而整有松徑有竹林有茶塢有泉有石可小憇憇而下至四潭又下循溪行至一潭巖壁峭立巨石偃側潭水沉碧奔流倒瀑如白龍下注時久雨積潦勢倍猛激噴玉飛珠洒落擊射聲雷點雨如霧如烟日光映之恍惚詭恠洵奇觀也二友相謂曰吾之不觀夫茲潭也十有餘年矣余謂之曰子昔之觀茲潭也果有以異于今乎曰年運而往矣潭則猶是也余又謂之曰子昔

之遊茲寺也亦有以異于今乎曰吾始遊于茲也若無寺也今而寺且煥矣余曰子知之乎夫山之有寺也人設之者也設于人者有成與毀者也山之有潭也天設之者也設于天者無成與毀者也且子亦知夫成毀之難易乎寺肇于唐盛于宋衰于元盛于明而嘉靖間又毀于倭元之事無稽倭之焚略一炬而忽諸故老又傳之及其毀而成之也中天圓公誅茅結廬者二十年叩闕而請者又八年公歿而其徒鑑公鏡公終其志者又六年然後天子宰相爲之檀越臨濟法嗣密雲費隱隱元諸禪師相繼提唱宗風以

迄于今甲子周而事始稍稍竣也斯不亦幾者易而  
成者難乎豈不在人哉嗚乎匪直寺也國之所以廢  
興存亡者亦然文忠有知尚三嘆于九原矣於是爲  
之記二友爲林雷先名起震林惠風名介王子字秉  
摩名家基余季子名喬之字公及

詞一則

龍潭祈雨詞

宋真德秀

伏以萬民之天所仰莫如穡事之難六月之雨不時  
深懼田功之失控誠以禱從欲是求睠茲百里之區  
實在七閩之首山崇川駛粟可去而不可來民悍俗

頑歲宜豐而不宜儉昨緣霜隕有害秋成一朝而攘  
奪並興殆幾挺變累載之葢藏悉罄僅足救饑幸禾  
麥之繼登與里閭而胥慶然穀直之騰未減而民力  
之困自如非大有之屢書豈小康之可冀乃由季夏  
驟苦常暘多稼垂成猶日望嬰童之長非霖弗續是  
賴虧乳哺之功倘拯救之少稽將危亡之立至不勝  
震懼有甚灼焚爰率籲于上穹冀興憐于下土勅羣  
龍而並起掃妖魃于方張大雨時行願弗愆于月令  
烝民乃粒實共戴于天恩

賦二則



黃檗賦

明林伯春

美百尺之喬木結深根于高岑枝拳曲而偃蹇葉茂  
密而繁陰豈榆柳之比性將貞壽而並林時食霞以  
吸露乃黃質而苦心類寒松之節操同嫠女之堅貞  
其朽散以自棄任霜雪之相侵彼桂何事而消亡桐  
胡爲而半死槿向秀于春朝蘭徒芳于江沚嗟萬有  
之必衰獨一貞之無已臨皓魄日輝生動微颺而響  
起

登黃檗山賦

獨往子性幽

七閩勝地十縣名巒枕榕城蔚蔚啓莆水潺潺源發

金支之頂秀來白鶴之間肘郭廬而腋大吉纓石竹  
而帶海山客從余遊者問曰此何區也董壺孫麗旗  
鼓讓幽竹葱葱兮露滴松鬱鬱兮風流無絃千溪兮  
彈伯牙之響有情萬壑兮載宋玉之愁擁龍田兮雲  
從萬里跨江陰兮水衍千溝遙望虎嶺之巔兮曾藏  
將軍俠骨近眺鰲江之下兮多繫漁子扁舟豈飛來  
之蓬島抑突出之天丘余曰此黃檗也考之紀載古  
已詳矣出紫雲焉問諸耆老今其知乎吾聞巨靈斧  
劈章亥步推彼焉界三千兮固尊五岳此也峰十二  
兮亦貴一坏子不見夫報雨初霖兮五雲繞天公之

塔鉢孟孤挺兮天柱空九郎之壘突寶峰兮斜挿考  
吉祥兮旋來羅漢騎獅子兮咆哮驚醒玉融之夢香  
爐供佛座兮慈悲燠騰福土之灰且有紫薇兮綴一  
方春色屏幃兮蔽四際塵埃此則茲山之大較然也  
自地占袞裳兮開衲衣之永紫流增濟水兮洗法眼  
以長青今者竹院風清兮高聳凌霄之節草菴月罩  
兮漸成挿漢之形看絳節峰頭兮也有黃金篩地角  
踏獅巖險嘴兮不無白棒摘天星且讀梅菴一碑兮  
知麋鹿上聞天語過普同諸塔兮識枯朽下擁地靈  
登斯山也眞令人有蟬脫物表鴻飛霞端者矣况有

時而龍潭珠垂兮鷺羽逞櫻鱗之勢有時而鱗洞燈  
遍兮神光生媚鬼之才有時而鐘樓響高兮遙應姑  
蘇半夜有時而經閣香落兮恰同靈隱成堆有時而  
蟬噪小溪兮和老人之十咏有時而鶴依方丈兮獻  
仙子之千枚有時而水月現觀音之容兮露出通身  
手眼有時而卧雲飄佛母之駕兮育成大地胚胎斯  
豈非盡福唐勝概極佛國奇觀哉然猶未也子不見  
夫風吹大小帽兮日月出沒其上雲迷木石橋兮魚  
龍變幻其間多年翁仲半埋荒草之中兮可歌可泣  
幾箇村家狂跳光天之下兮如黠如頑古樹陸離兮

感春秋之易度新蓬荪荂兮念歲月之維艱靜言思  
之妙藥難駐紅顏兮徐福之舟不復金風已催白髮  
兮魯陽之日難攀果登山而有得應案屐而自潛客  
笑曰夫鳳凰之異于山雞者羽毛之美也麒麟之殊  
于走獸者首足之文也融邑固多君子塘水豈辜名  
家子乃墨胎之餓骨豈知聖道之龍蛇余曰其然乎  
豈其然乎子不見夫眞氏來禱兮而九潭增色江郎  
有賦兮而滿筆生花常觀察之遺教兮不朽林太丘  
之理學兮堪誇藉流民一圖兮鄭介公之風流如覩  
考歷相四主兮葉丞相之天業未遐事卽此而達彼

道有然而豈徒子不見夫正幹通玄兮檠味迄今猶  
苦鴻麻罵賊兮樹頭萬古不污斷際三弄爪牙兮宣  
宗之掌痕長在中天八經寒暑兮神廟之御典不誣  
况雲布且密兮擁單傳之寶道費而隱兮得直指之  
珠今何必遠遡文文山之爲奇男子定指李若水之  
爲大丈夫只此月照山間兮露清霜冽何處更埋黃  
巢之劍霧填谷口兮燕去雁來相逢盡道白乳之願  
念之哉龍藏猶存碩果豹隱方是故吾數點磬聲兮  
并不聽雲中之雞犬半生豪氣兮却俱冷山前之鷓  
鴒固知文之未喪或守道以有須客于是栗然而恐

惘然而悲余因進日子休美圓頂支天兮裴休猶爲  
着相遠公旣遇兮菊花亦覺累人舉足皆幻美景匪  
真滄海桑田兮莫恨山河非舊花容鳥語兮別有天  
地維新子休矣吾其自此獨往矣遂揖去客捫衣尾  
之溯洄于九淵而不能從也余遙語之曰吾道存歟  
非山亦非水吾道亡歟可水亦可山子豈復求我于  
人世間也邪客目送之莫知所之閩中士大夫有聞  
者相與載筆覓焉聞其無人但畱墨跡數痕石上而  
已過而讀之渺不可得

贊七則

開山正幹禪師贊

隱元琦

含曹溪毒入黃檗林  
渾身是苦遺累至今烟幕幕雨  
沉沉千古何人解此心

希運禪師贊

脫白斯地緣生福  
唐機投百丈舌露鋒芒在在標名  
黃檗也是熟處難忘杜撰接人六十棒  
流傳惡辣徧諸方

懶安禪師贊

識得牛兒驀劄歸欄不犯苗稼  
真個懶安突出閩城  
二十載占人田地太無端



月輪禪師贊

踏破草鞋不識和尚獅子嘖呻猿猴伎倆撈摟再三  
歸去來月輪不在秋江上

中天師祖贊

把茆廢址屢受訶煎六十有五匍匐帝前請經鎮糾  
行業湛然龍樓顯煥卓立中天全彰祖道耀後光前  
天童密師翁贊

岍睂卓朔雪髣髴鬆單提柳栗如虎若龍截斷諸方  
要道掀翻黃檗家風殃及兒孫不了遍尋到處無踪  
近日有人報道公然坐在天童

本師費和尚贊

舌起浪堆眉挂鉗鎚結佛祖警爲生靈災觸着喪身  
失命擬之怒吼如雷當年錯禮三拜至今懊恨未灰

居士詩

梁

宋

明

遊黃檗山

梁江淹

長望竟何極。閩雲連越邊。南州饒竒怪。赤縣多靈仙。  
金峰各虧日。銅石共臨天。陽岫飛簷彩。陰溪噴龍泉。  
殘杭千代木。唐萃萬古烟。鳥鳴丹壁上。猿嘯青崖間。  
秦王慕隱淪。漢武願長年。皆負雄豪威。棄劍爲名山。  
見我葵藿志。松木橫眼前。所若同遠好。臨風再悠然。

敘題十二峰

宋王大復

寶峰屏幃紫薇邊獅子香爐佛座前  
羅漢鉢盂天柱上五雲報雨吉祥連

咏十二峰

陳確

寶峰

草木分餘潤輝光射斗間  
誰知天下寶盡聚此名山  
屏幃

微雨一番晴峰巒色轉青  
笑他摩詰手祇會畫山屏  
紫薇

夾道藤蘿古森森桂木繁  
夜來天上燦直接紫薇垣

獅子

頭氣三秋肅悲風萬竅號凭欄傾耳聽哮吼一聲囀

香爐

裴公留客一何堅象設爐峰置目前若論本來真面目混成那似此天然

佛座

氣格非凡畧清虛別一家綠陰團寶蓋彷彿坐蓮花

羅漢

天台遠勢來化身前峰上日出霧露收巍巍現金栴

鉢盂

峰勢團團就山嵐滴滴濃鉢中無一物只是要降龍  
天柱

峭峭連雲聳迢迢遠地來峻嶒非一狀直是小天台  
五雲

瑞氣浮晴空峰巒自不同至今雲五朵猶認是郇公  
報雨

峭拔藏蒼麓烟雲晝長鎖天際雨將來山靈已先報  
吉祥

佳氣何蒼鬱林祥日日開幾多如意事總向此山來  
題靈淵  
趙卞

靈淵無底石嵌空萬丈飛泉落半峰寄語魚蝦莫相侮此中蟠螭有蛟龍

過黃檗聽杉長老談禪

蔡襄

一圓靈寂本清真誰向清波更問津欲說西來無見處奈何言句亦前塵

登覽秀閣和康侍郎韵

夏之文

重來登覽秀雨歇暑風微山色長如畫天光不可攄巖幽聞夜嘯花落見春歸莫遣天花墜沾粘座上衣

次韻

林栗

偶來散居上寓目見纖微巖嶂層層出杉松匝匝圍

猿攀高樹舞鶴拾稿枝歸坐落雲頭起倏然欲振衣  
遊黃檗寺 李彌遜

苦爲捫藤行正坐愛山癖振衣雲中樹洗耳泉上石  
稍尋優鉢林偶傍瞿曇宅溪行走羊腸山轉回龍脊  
兩難伴指筇二老共飛錫望迷落葉秋出斷蒲團夕  
雲歸遶窓明香盡出簷碧希聲發巖竇妙觀生牆壁  
塵緣苦推攀勝事成今昔離家月垂鈎歸路月掛壁  
師今一帆輕我向百里役船子罷持橈趙州行葛直  
遊黃檗寺 翁卷

天下兩黃檗此中山是真碑看前代刻僧值故鄉人

一宿禪房雨經時客路塵將行更瞻禮十二祖師身

又

劉克莊

猶記垂髫到此山重遊客髩已凋殘寺經水後增輪  
奩僧比年時減鉢單絕壑雲興潭影黑疎林霜下葉  
聲乾平生酷嗜朱翁字細看荒碑倚石欄

又

林希逸

黃檗山前古梵宮早年屢宿此山中猿啼十二峰頭  
月鵬送三千里外風日者共遊因辦老期而不至有  
樗翁騎鯨人去相如病更欲攀躋孰與同

讀石閭字刻感賦

明何御



朝自西山還遙遙望黃檗想像二十年于今始登陟  
芙蓉照清波瀑布懸絕壁洞底白雲興誰復採芝人  
山鬼嘯林風野狐怒人跡歲深石刻殘讀之不盡識  
因嘆邑賢心惘然悲今昔

人日遊龍潭

葉向高

人日看山雨乍收溪光山色向人浮晴雲不散澄潭  
影新水初添曲澗流選石移尊同取醉捫蘿覓伴共  
尋幽陵源深處何須問但見桃花便好遊

同歐陽邑侯遊黃檗

千盤歷盡俯平蕪萬頃烟波入望孤竹裏布金畱慧

月巖前飛瀑放。數珠中天絳節還。臨否玉井仙漿可。  
在無惟有青山憐傲骨。不妨終日坐跏趺。

觀龍潭紀遊四首

黃檗道場古。乘閒載酒過。層巒通帝座。縣溜落銀河。  
路轉人踪少。林開爽氣多。生平愛幽絕。對此欲如何。

其二

靈跡何年著。蛟宮此地開。湍流爭噴霧。激響欲奔雷。  
不辨磨崖字。空餘翳石苔。誰云弱水隔。峰頂卽蓬萊。

其三

寶地圍青嶂。龍湫落翠微。晴虹低飲澗。寒雨亂侵衣。

濺石驚珠墜因風作絮飛臨流欣濯足心賞莫言歸  
其四

入谷山如削蒙茸手自披清溪分樹出高岫與雲疑  
波動龍初戲林喧鳥亂窺不緣避暑飲安得此探奇  
登絕頂有引

黃檗名山也而寺久廢余謝事日適 皇上念及  
海邦遣中使賚經來賜余與親友重興新剎爲藏  
經祝 聖之所因同林大默大範蓋夫倬夫輝夫  
吳伯孚鄭叔熙來遊是山之高可數千仞其巔爲  
大小帽二峰有留雪嶂鱗洞九淵潭諸勝而第一

潭最奇深碧無底真神龍所居水簾瀑布彷彿九  
鯉十年前曾與大默約登絕頂蹉跎久之茲乃得  
暑而行道甚嶮絕攀木緣磴頗極艱辛從者以爲  
病而余以探奇不暇顧也爰成四律用紀壯遊  
琳宮新敞古壇場貝葉琅函出尚方自識禪心超色  
界還憑帝力禮空王龍潭倒影千巖碧鳥道斜縈  
一線長此地歸依情不染更於何處覓慈航

其二

第一名山勢鬱盤登臨方覺海天寬丹崖常積千年  
雪陰洞還生六月寒自製籜冠來野外共扶竹杖上

雲端茫茫塵世何須問萬仞峰頭一笑看

其三

絕巘登來路未窮。脩然兩腋起天風。山形大小皆成  
帽。石勢高低盡插空。瀑水亂侵人面溼。巖花交映客  
衣紅。勝遊喜值昇平日。烽火休傳大海東。

其四

層巒高處晝常陰。此日雲開見遠岑。杖底芙蓉峰九  
疊。崖邊石藟壁千尋。苔封洞府蹤難覓。山壓樓臺勢  
欲沉。不是老來偏好事。攀躋已負十年心。

同葉太史遊黃檗次和

歐陽勁

天風濁酒灑靡蕪面面芙蓉別處孤託乘誰應攀鶴  
馭裁詩君獨握驪珠黃符絳節還高下瓊樹瑤花定  
有無著就一家言秘否青山何處坐跏趺

遊黃檗

林堯俞

南宗古德傳心印千載來人尚禮瞻再闢琳宮增翠  
律新頒法藏倍莊嚴羣峰拔地環如障一水從空灑  
作簾陽岫陰溪尋欲遍慙無彩筆續江淹

登黃檗山

李開藻

黃檗西來自有山石橋初度野雲還分明一滴曹溪  
水流與龍潭出世間

藏經閣

岩堯傑閣倚雲樞中有瑤函億萬言  
努目揚眉都是也憑誰解報聖人恩

閱黃檗心要

祖祖相傳只一心心心相印到如今  
當機不遇河東宰千載何曾聞法音

宿禪房

千崖石磬一聲孤雙樹庭前日影疎  
禪意道心俱寂寞片雲何處更安居

遊黃檗寺

何喬遠

黃檗名山只見山。我來不得一枝攀。心醒百丈吟吟笑。經讀裴休得得還。御藏不恩金碧外。羣峰偃仰几筵間。龍潭老足相欺甚。但許中宵夢裏閒。

和葉相國遊黃檗韵

金峰與銅石。奇怪千萬片。吾讀江淹詩。未知所麗美。十二祖師身。不啻滄海變。公來游其間。似睹西域眩。既已陟層層。猶欲窮面面。陽岫及陰崖。誰道不能遍。

遊黃檗

曹學佺

朝辭石竹路。逶迤暮入禪林境。自移橋下清渠爲草積。門前古樹作簾垂。諸峰翠黛分深淺。一勺寒泉歷



歲時昔日江淹來此地縣崖何處有題詩

登絕頂

高山有奇洞靈物之所處其觀多怪譎大言似誇詡  
我直持一勇於以勝百阻路長到實難食人有猛虎  
天陰日無光雲霧作細雨潭壑乍隱見鄉縣悉周溥  
仙人雞犬鳴聞聲不可擬入木成戈矛叩石如鐘呂  
遇物雖駭新本質實已古好遊不學遁來此亦何補

步葉相國遊黃檗寺四韻

江朝賓

山中隱隱一道場天語迢迢到上方不有廬山居慧  
遠空譚西域夢君王龍湫擬接曹溪近寶錄升封華

祝長共說南宗多勝派誰知此地大舟航

其二

紆迤鳥道鬱千盤到處峰頭入眼寬  
谷口啣盃爲避暑龍淵噴霧轉生寒  
諸君共愛上方趣此日誰同萬仞端  
更有詩篇畱在壁琳瑯應恣客游看

其三

獨立孤峰意不窮蕭蕭杖屐度天風  
河山點綴微成象身世鴻濛總是空  
倦鳥不忘春谷語歸鴉猶帶夕陽紅  
何時了却塵緣緊習靜長隨鹿苑東

其四

青山寂寂暮來陰。天際歸雲傍翠岑。牧笛已隨谿水去。禪鐘還向梵林尋。驚心險徑休相問。回首晴嵐已欲沉。不有空門忘色相。更於何處覓初心。

閱龍湫

林大啓

久仰靈淵異。今朝眼界舒。誅茅尋鳥道。拂蘚讀蝌書。瀑瀉寒威起。雲飛暑氣除。竒踪乍見。登陟興何如。萬曆戊申歲仲秋九日。慶雲現于黃檗佛座峰。誌喜。

黃檗靈鍾十二峰。卿雲俄現翠微中。凝成五彩諸天麗。吐出千章四海紅。葢影輪囷符漢主。唱名輝焯應

韓公遐方快覩禎祥象爲慶明良此日逢

卜隱黃檗山

歐應昌

黃檗名山峙海邦標崇列秀吾之鄉中有九潭龍所  
藏峰巒十二披霞光珠珠隱隱山色蒼我思結屋蒼  
山陽山雲隨意入我房山月隨時照我床足當好客  
無相妨經歲勤力鋤乃荒瞻彼黃鵠高飛翔星辰燦  
燦夜未央山中搔首河漢長

遊黃檗山

翁紹揚

寺沉暮靄石沉苔野竹蕭蕭一徑開報雨峰高連絳  
節臥雲菴敞接花臺潭深有沫雙龍戲樹老無枝獨

鶴迴爲說游人貪結果莫教鐘磬亂相催

初至黃檗見寺荒涼有感

林伯春

祇林開創在何年幾樹長松老帶烟  
經藏舊基渾草坂梵宮遺址半秧田  
空留寶鐸凌空韵誰捨黃金布地錢  
佛法西來應未斷蓮花五葉再當鮮

觀龍潭

靈淵一壑半山頭水色藍光日夜浮  
百尺珠簾翻澗落千年瀑布貼溪流  
懸崖峭壁難窺路古木長藤不記秋  
洗耳掛瓢何處可吾將此地學巢繇

陪葉相國登絕頂次和

黃葉重開選佛場。莊嚴淨土卽西方。石牀迸處看龍  
如花徑。紅時見象王。雙屐登臨逢世泰。寸心早晚祝  
登長。東山未許堅雲臥。苦海還須一葦航。

其二

懸崖峭壁路千盤。到得上頭覺地寬。日影爐峰浮暮  
紫。雲連帽嶽起秋寒。從游最喜來方外。續句無能托  
筆端。更欲乘風凌汗漫。四埏八極一時看。

其三

諸峰歷盡興無窮。轉覺飄飄若御風。黃閣暫辭君寵  
聖。白雲新訂宦情空。強躋峻嶺瞻天近。笑指祥雲捧

日紅海上烽烟傳已息。遨遊踪跡任西東。

其四

樹影參差翠色陰。秋雲忽起暮西岑。攜觴與客臨風引。歸路呼僧帶月尋。竹院鐘聲敲已罷。蓮宮漏落夜初沉。爭看秉燭題佳句。始信當年快賞心。

黃檗新橋三樹偃蓋如亭。因名曰三樹亭。余嘗坐息其下。神情爽快。戲吟三字詩以美之。

一橋亭三柱下。千枝椽萬葉瓦。明月篩清風灑。坐其間欲仙也。

天柱峰

玉筍成天柱。攀躋欲墜魂。孤高通帝座。秀特迥山羣。  
肩背日摩跢。朝昏雲吐吞。千峰看盡小。獨爾最稱尊。

宿黃檗寺

徐 炯

青峰十二削芙蓉。黃檗開山第一宗。陰洞有靈蟠巨  
蟒。古潭無際蟄神龍。門通十畝林間竹。路指千年壑  
底松。覓得雲房聊借宿。半天殘月上方鐘。

遊黃檗寺

鄭履和

古殿爲灰樹鬱蒼。亂山如黛下斜陽。竹盤絕磴臨溪  
綠。松帶枯藤間葉黃。遠岫雲飛龍噴雨。深林風急鳥  
啼霜。跢跢共證無生理。也學頭陀禮法王。



遊龍潭

林正立

沿流覽勝陟層巔。拾翠雲封別一天。惟得風雷生足下。喜看花雨落岩前。潭鍾靈氣聲猶切。山待高人色更鮮。六十餘年空負也。今朝滿地盡皆蓮。

遊黃檗

林茂枝

籃輿折落屢尋幽。爲法何妨竟日遊。宿衲無心能濟世。名山有主却忘憂。千年猿鶴同招隱。萬壑烟霞一望收。濁刼那堪人共語。惟餘赤膽對林丘。

槩山阻雨

歐玉鉉

補天無計步艱難。何得羣峰破怒顏。淚已鶯啼方在

柳人猶燕處不如山縱然學道應須靜豈有閑心盡  
入閒偶爾行藏能作主任教溪舌日潺潺

春日過黃檗謁隱大師

陳匡生

十年烽火入門難此日偏開風雨顏高座讓公能漢  
語向平先我負名山春泉水試茶心苦迷路人羞佛  
性閒夢裏疎鐘天半遠野橋林外故潺潺

冒雨檠山訪友

珊珊屐齒雨餘痕百里尋君叩寺門方丈好賢輕一  
拜山中知己重深言禪惟蘇晉能逃入社豈陶潛不  
許存清眼干戈荒草路鬚眉難與佛爭尊

又

林朝見

高僧日與話南宗。踏遍名山十二峰。  
鐘送月來風掃樹。白雲流水冷青松。

又

陳天爵

幽棲近與縑山通。五里烟光接竹叢。  
草徑緣溪頻屈曲。泉聲得石故玲瓏。  
相攜有客重探勝。借榻從僧細論空。  
自是坐來心境寂。梵鐘林外送秋風。

春日散步黃縑山中

吳侗

春入春山春可憐。芒鞋隨處踏春天。  
臨流瞰石渾疑虎。空谷逢人却是仙。  
珠瀑晴飛雙嶂雨。石門寒鎖一

溪烟峰頭好景須探盡莫向深林聽杜鵑

恭迎密雲和尚感賦

卓冠

黃檗宗風第一禪大師飛錫振龍天妙雲欲覆涅槃  
海法雨先滋熱惱田一春亢陽師至日即雨直令化城安疲衆  
不殊祇樹禮金仙空餘俠骨成追悔潦倒在華四十  
年

密雲和尚開期喜頌

法鼓逢逢夜正中重看黃檗振宗風拈花一會依然  
在大地山河月滿空

乙亥春日遊黃檗山

費道用

幾年聞說此山幽。今日方從靜侶求。尋路履披雲影濕。隔溪鐘泛樹聲浮。峰開十二蓮花碧。輪轉三千貝葉流。稽首導師寧用語。安心無法可相謀。

其二

雨餘羅列玉浮圖。萬壑松風帶鳥呼。新水平鋪茵正嫩。淡烟微綴翠偏腴。青鞵布襪招僧侶。白社詩壇賸酒徒。我倦欲留留不得。回頭戀煞竹蔬厨。

侍費老師遊黃檗山次韻

林弘祖

十二峰高一徑幽。客來曾許靜相求。卽看潭水何從定。莫問山雲底事浮。演梵正披新勅賜。逢僧偏得古

名流不禁此日重回首心日悠然已自謀

其二

山水難窮只按圖每逢靈異便驚呼何如一策藤根  
瘦飽嚼三春笋蕨腴棒喝自傳黃檗派詩狂還許白  
蓮徒移尊試看龍湫好却起青烟竹外厨

觀龍湫

凌世韶

我禮黃檗山陟巘入蕭散靈淵數疊垂中坐石紆坦  
眺聽疾送迎文字剥空窾茹妙飲晴香息念得幽盥  
懸簾卷玉輕長瀑依苔緩濺落萬斛珠時起眠龍懶  
謁松斲已去鹿草席猶暖更登尋其源齒齒歷玄館

歸來問阿師路窮天未斷

遊黃檗

劉以修

嶙峋十二削芙蓉。公暇纔聞到寺鐘。  
石乳噴珠香玉液。瀑花飛雪掛蒼松。  
客尋古洞驚神蟒。僧過澄潭制毒龍。  
滿眼春光何處望。青青遙送海天峰。

次葉文忠公韵

吳鍾巒

敢謂心安卽道場。救時空切乏良方。  
不參句子依禪子。爲念君王叩法王。  
風度曲江人未遠。謀猷磐石計應長。  
誰知此日新亭淚。灑向涼颼到海航。

其二

世路平陂有折盤。佛家田地自來寬。山空畫永金身靜。樹合羣峰碧影寒。象教悉皈三藏內。龍章曾錫五雲端。祝釐當代方全盛。丞相風流帶笑看。

其三

驅車何往泣途窮。安得冷然善御風。經過好山渾若夢。坐來大地已成空。苔紋堦下沉沉綠。花蘂庭前細細紅。肩雨欲尋名勝處。水雲零亂忽西東。

其四

我來訪勝值重陰。處處飛流落遠岑。方外黃冠隨去住。客中白髮苦侵尋。愁將孤憤呼天問。悶讀離騷發嘆吟。



陸沉寄語九淵龍子遁開雲捧日豈無心

觀潭

禪關寄語亦何求聊以登臨暫寫憂淵靜抱珠龍德  
隱山深漱石瀑聲幽來看天上幾千尺出到人間第  
一流已隔恩波塵世外褰裳此地可淹留

塔巷

自笑身如不繫舟小巷堪憇亦優游松間坐石溪雲  
起竹裏烹茶澗水流微雨忽收山寺午涼風初拂海  
天秋僧家受用無多許一句彌陀萬念休

次葉文忠公遊黃檗韻

劉沂春

自慚少壯獵名場。垂老歸休索禁方。無奈烟氛迷世  
界。空留餘齒惹君王。遭時不遇嗟籌短。擊楫同流引  
恨長。却羨深山毳衲子。莫驚刁斗度慈航。

其二

大塊江山托一盤。華夷分畛幅幘寬。西方教演塵心  
淨。南國風聞素膽寒。日近龍蟠知有主。夜深虎嘯豈  
無端。太平伊邇浮常慶。分付叢林輟咀看。

其三

生來不厭世途窮。孤憤恒懷虎嘯風。夢裏山河渾是  
舊。眼前光景總成空。有寬未雪心徒赤。無事看花淚

染紅檠岫森森幽絕處那知羣策躍江東

其四

四望昏霾接地陰  
陽光久待煥高岑  
水寒隨澗千條  
瀉關遠迷雲幾度尋  
古寺隱藏鐘磬細  
野廬荒燼折  
聲沉忽然風起天開霽  
萬國歡呼捧日心

次曾祖文忠公韵

葉霞丞

翻來覆去事何窮  
到底深山有古風  
悟至一身都是  
贅判將萬法盡歸空  
心枯座上嵐光翠  
睇引天邊返  
照紅只自閉關成  
獨寐不教痴夢得西東

又

百年消息任晴陰。且對孤雲掛遠岑。錫自卓來宗再振。柯曾爛否路難尋。燈前孤劍蒼天老。竹裏疎鐘白日沉。稽首十方諸善信。一齊認取本來心。

遊黃磔

林邦翰

驚餘殘夢每尋幽。撥得閒身結伴遊。梅榦凌寒初送馥。溪聲詒舊故爭流。三千界事誰紛靖。十二峰雲任去留。孤憤世情無處說。山光踏破忽忘愁。

寄贈黃磔隱和尚

錢肅樂

法乳垂垂第一宗。深山深處白雲封。慧珠散朗三千界。德澤飛懸十二峰。天際花光分法相。岩前潭影落

疎鐘生平磔味寧難盡不及登臨謂瑞容

奉侍凌鏡汭公祖觀龍潭

林國炳

欲得尋幽處凝望幾週迴捫藤疑接漢側耳若轟雷  
簾影噴珠玉瀑沫潤蘚苔草木長年護烟霞旦夕開  
此日凌雲客當年入定裴獨立空潭際須彌自勺杯  
宗風舊黃檗江山暫蒿萊翳翳憑搜剔草野喜追陪  
逝者如斯爾酣遊興不灰聞師曾一喝能令百川回

遊黃檗

吳士瑰

栖心佛國厭名場遊息新成却病方百丈遺風留馬  
祖九潭澄影隱龍王燈傳本賴因緣合法護應思願

力長當日貝函羅御府誰教萬里入車航

其二

十二巍峰日易陰青青芳草滿層岑僧閒始覺農非  
苦山好常招友共尋到處滄洲容嘯傲此時身世付  
浮泥題詩說偈真多事坐臥能通靜者心

題黃檗寺

曾紹煇

宗風在處散天香祖印惟人只自當大道迥然超色  
相初心湛爾絕思量離披今古呈真界廓徹乾坤步  
大加直下了知無別事不隨雁影過瀟湘

又

張廷範

尋師因覓寺。識路始窮峰。數葉開蓮座。千枝傳幹宗。  
僧叅方歇。客到復鳴鐘。報雨前山是。澄潭起躍龍。

寓萬松菴

林子春

芒鞋竹杖最相宜。信步行行隨所之。白髮不知明日  
事。青山還似去年時。花容未盡春先老。雨色初昏日  
已遲。芳草萋萋迷去路。王孫何日是歸期。

其二

半似聰明半似癡。柴門寂寞也棲遲。多因適趣便成  
韻。豈是消愁強賦詩。客雨乍來花濺淚。亂雲驟起石  
添衣。青山爲我羞知己。終日無言獨皺眉。

喜隱和尚開堂

林宗澤

挿草成宮幻幾重  
翠微環鎖碧芙蓉  
一燈月印三千界  
半偈花飄十二峰  
龍象喜開新法眼  
風旛長整舊禪宗  
不知棒喝吹毛動  
若個能當劍刃鋒

遊石門

林介

石門夢想久相關  
十載舊觀笑未還  
今日我來另闢眼  
收羅萬壑與千山

又

陳特

石門深處是雲關  
來路原從去路還  
笑却許多門外漢  
亂雲堆裡撥青山



又

林啓棻

芒鞋踏破幾重關。親到龍宮探寶還。怪得石門扃不  
固。珠花無數潑春山。

又

趙連城

石門無鎖不須關。一任閒雲自往還。洗得門前淨似  
水。只畱瀑布漂青山。

遊龍潭

老龍宮裏雨花飛。閒捲珠簾坐翠微。只爲年來貪聽  
法。故懸瀑布剪僧衣。

其二

酒花石上雨花吹，狂吼驪龍共醉遊。  
領下一珠藏不得，倩風高挂玉簾鉤。

寄呈隱老和尚

姚翼明

浙西衲子日明心，三十年來出虎林。  
赤脚陸行幾萬里，空身浪擲百千金。  
久思黃檗山頭息，誓向青蓮窟裏尋。  
從此俗情須斬斷，雲中但聽海潮音。

遊黃檗

何旦

萬壑寒松作夜流，僧窓話許正當秋。  
月經絕巘明猶隱，人在深山夢自幽。  
會是心空宜寂寞，忽因雲過任沈浮。  
一堂禪定鐘聲斷，四望高峰興已悠。

又

池顯方

戴笠隨雲入竹叢。清香一炷卽眞空。試看內典三千法。盡在前峰十二中。度母江頭稱大義。生兒天下遍宗風。猛聽黃鳥松梢語。疑是高聲喚遠公。

又

陳尚庚

十年清夢訪名山。未識名山鬢已斑。懶性羞將遲暮遣。浮生浪托歲華閒。衝寒秉燭逢長至。結侶扶筇上九灣。踏破檠林峰十二。叩關直謁老瞿顏。

壽隱和尚

林 嶠

老人住山在黃檗。桃塢桃州開向夕。落花片片入窓

扉回首白雲又接席石橋玄度斷人行惠公杖屨恒  
自適獨往之人細萬物手弄元化携金策我臨海嶠  
一相思城頭霞起城下碧

又

陳虞文

峰開十二紫光浮慧眼高懸四部洲萬顆明珠甌率  
雨三車演法赤霞秋碧潭洗鉢龍歸藏翠岫談經石  
點頭古佛由來無量壽漫傳花甲巳云過

又

余志秩

不爲尊生集衆緣吉祥護擁五雲邊天周花甲逢初  
慶人得薪傳卜大年浴水聞香尋菊後歌嵩聲發咏

梅先自慙寅降同斯日何事醒迷若判然

又

吳葆

肅穆聞鐘磬祥雲護法身飯依來鹿鶴貞固比松筠  
座上鬚眉古山中草木新開士如師者何殊金聖人

又

薛道人

古佛行藏別洞天長生還是不生年推翻獅子無邊  
岸度却人間沒底船棒吐毫光圓六丈潭空聲色遍  
三千欲知面日向何處打破關頭只一拳

又

林宗聖

寺門羅衆峰一望蒼浩浩知有壽世人其身合壽考

永雪爲精神。雲霞爲文藻。五嶽爲真形。造物不能老。  
片心化空潭。塵慮淨如掃。獨笑神仙愚。忍劫居蓬島。  
何必西池桃。何必羨門棗。隨意饌伊蒲。自然容顏好。  
禮足我師前。敬愛交懷抱。泉明對遠公。相知恨不早。  
偶入石林來。從人效松禱。花木難久榮。法躬可長保。

梅福菴

環菴不但梅。直以梅爲主。想見種花人。寒香入肺腑。

又

吳承啓

投杖自踟蹰。白雲錯認客。不待花之開。空香如可擷。

石橋

散坐石梁中影隨流水去月痕與樹陰多是澄心處

方丈茶話

施樵

松筠未便隔人間卽景栖尋豈是閒一榻對師心自  
遠個中認得萬層山

遊黃檗

山興何曾滯雨聲善遊原不碍陰晴竹房僧有無窮  
語春澗雲非一味生違俗已能先領悟隔橋妙在未  
經行且同細酌夜來靜半是疎鐘濕又明

又

懸泉高拂竹千尋萬樹未花雨有心路小又侵苔葉

半橋危偏引勝情。添窮搜古蹟如終卷。痛快斜暉似  
惜陰。僧偶開門筇偶倦。茶香款款。輔幽吟。

又

王元升

老樹槎枒路鬱盤。到來方覺道場寬。風前試茗松聲  
壯。竹下敲棋日色寒。流去世情春水上。帶歸遊興暮  
峰端。瞻依名刹綠非偶。新舊威儀次第看。

又

歐永堅

也將書劍問名山。猿鶴無心水自潺。滿地黃花因我  
老。數莖綠竹爲誰刪。疎松密寫千枝恨。排石微教一  
日閒。長齒不驚龍卧久。潭頭拾得白雲還。



九日謁隱老和尚

林繼敏

古刹出上方。黃檗名已久。伊昔思負笻。今茲得稽首。  
陟歷山之巔。到來九月九。此日啜嘉茗。何事傳黃酒。  
登躋未及嶮。眺望立高阜。悠然爽心目。曠矣離窠臼。  
三千界一如。十二峰左右。叢竹森以矗。寒潭清且澗。  
梵宇敞巍峩。貝葉列瓊玖。經函捧上京。展誦瞻我后。  
一拂西方來。隱公黃壁壽。懺禮問大師。洪鐘敢小叩。  
未定思生慧。鋤蓮以百藕。未能洗胃腸。曷以翻筋斗。  
紛紛處塵俗。默默觀空有。火坑已墜身。丹梯望引手。  
師言指不二。我心披荆莠。始知探龍湫。更聞真獅吼。

高足立師門。論心稱作友。禪心與詩思。闢戶而啓牖。  
既以發真諦。大能掃煎毒。相對喜開顏。獨我愧掩口。  
未了死生緣。可堪棒喝否。

又

林繼京

侵曉別崇阿。又思躋吉寺。遙指鬱葱葱。萬木集秋氣。  
一舍路盤迴。停午行方至。仰看六六峰。比連繞蒼翠。  
寶刹煥何年。莊嚴各位置。貝葉與琅函。悉皆內藏賜。  
所以山益靈。代有高僧寄。今日知者誰。隱公出相繼。  
臨濟之真傳。正宗三十二。肩力苦支撐。淡泊堅誠志。  
紫霄醒迷途。天人均受庇。種種收頭然。功德難思議。

余家滄海濱百里來猶易况負泉石懷何由不早詣  
乃待晚歲間登高履茲地莫非結宿緣與師有默契  
入堂頂禮時寸心會真諦

遊龍潭

劉履丁

蛟宮遙望挿雲霞開士躬耕擬作家石上心齋多水  
色頂門香雨噴天花山公說虎牛頭下羽客談龍鳥  
路賒此地却難休歇處扶筇更上莫周遮

登四潭絕頂

林百燕

杖屨飭然絕點塵窮登石磴草痕新亂溪水繞難尋  
路古徑烟深不認人山外老僧同鳥隱雲端小築與

天隣若能此處投身靜何必桃源可避秦

訪隱大師作

林崇孚

巍堂憶自嶺南來極樂菴同般若臺  
慧炤早懸頭上片機鋒迅喝耳邊雷  
迤元政爾推黃檗偕隱何人訪  
大梅老矣屹嶰窮子恨空教素手寶山回

黃檗夜咏

王真

寂寥自是此山秋况復深心見夜幽  
一磬飯僧歸鳥遶數峰迷月暗泉流  
滄桑事大人難語身世情空佛  
雨來地滿風塵誰得飲行將惟許許支遊

遊黃檗

石槐園

飛來峰十二度却界三千境寂如無地僧高州在天  
青松知入定綠竹也通玄無限崎嶇意行行到此平

遊一潭

林守穡

靈潭勝處謫名山共喜搜筇到碧灣  
荔薜披來人影出雲根坐憩水聲潺  
珠生絕壁青天唾月掛長流白練環  
閩粵霸圖今已矣低徊疑是釣龍還

遊黃檗

林之玄

霽後千峰淨碧蓉曉雲推夢醒玄宗  
春山積霧應潛豹夜雨空潭想臥龍  
人度潺湲支一竹鳥分靜理寂高松  
離塵數里頻過此不記閒閒幾度鐘

重遊黃牒

施宛駒

濯去衣塵上碧岑一聲清磬廿年心  
嘯吟但肯招元亮名理誰堪接道林  
獨爲烟霞畱器鉢自然山水見高深  
半生細省浮頭在今日能無托靜尋

遊黃牒

林啓茶

溪聲怒濺鳥聲寒塵想遙遙共草刪  
傲骨只餘雙白眼舊交惟是一青山  
秋風不瘦江淹筆吟片長畱慧遠關  
借問九淵誰得似幽心莫負水潺潺

觀龍潭有感

珠花亂擲碧潭春鳥瞰危濤不怯人  
幾字滅明石壁

上青苔欲奪客衣新脫屐坐雲生遠想冷然喪我不  
留塵自昔西山來一禱至今流水見精神水流不拖  
人影去遙遙獨見白雲親世事既如此何須別問津  
只此潭頭待吐月傷心莫動老龍嗔阮籍空多窮途  
哭東施枉效西施顰洗心退藏覓箇裏但有清流不  
厭貧千仞飛崖侵鹿爪御風聽瀑悟前因

槩山留別隱大師

施宛駒

踪跡思歸方外難千溪未浣厚羞顏春過麥秀皆誰  
地雨足薇肥獨此山道在斯時偏用拙天生我輩豈  
能閒他年白社招幽客一杖依依聽水潺

遊黃檗訪隱元和尚

李珣

偶來古檗訪南宗。乘興時登十二峰。  
四顧林巒香霧合。幾看殿閣紫雲封。  
禪心水湛消塵慮。慧語茶清醒世容。  
今日支公能愛客。擬將書劍寄行踪。



黃檗山寺志卷八

住持隱元琦重修

門弟子性幽編閱

釋詩偈

觀葉相國詩扇次韻

密雲悟

及第心空選佛場。個中無地列隅方。一毫透體豁惺  
眼。十界通身現法王。迷去妄分人與我。悟來了却短  
和長。回頭直下情無飾。便是高登彼岸航。

浩然之氣勢。旋盤充塞乾坤絕。窄寬一雨普施滋。草  
潤密雲彌布蔭。人寒西來祖。令當頭指。東土兒傳正。

眼端祇爲分明人不薦故令高着眼睛看

貧僧偏愛破家窮赤體條條露骨風歷歷我人皆實  
相明明心境總真空月明虛白連天碧日照雲霞映  
水紅隨色摩尼不墮歟祇因逐物着西東

本心地不屬陽陰迥出乾坤覆衆生萬法馬師都吸  
盡一人龐老絕追尋全身用去頭頭現觀體行時物  
物沉外境內神無覓處須知憑悟本來心

又

費隱容

就地翻身大覺場一毫端上徹殊方全身披露乘獅  
子十界總如跨象王栗棘直拈三寸短神珠照握億

州長傳提祖令寰中指起日迴風鎮遠航

其二

一句當前踞地盤其風凜凜海天寬用時敗種心徒  
熱舉着焦芽膳自寒殺活誰分凡聖路縱橫熟辨妙  
玄端機如掣電誠何旨說似禪人子細看

其三

無地卓錫尚未窮錫無赤手振家風全身默示離玄  
象覲面提持脫有空歷歷窺思形赤白明明擬契墜  
青紅吾門作用由來別一棒當頭杳絕東

其四

本分壇場不落陰當軒踞坐出羣岑毛端刹海猶成  
迹大地塵收還涉尋遽爾超方忘巨末迥然物外絕  
浮沉堂堂任運裂情謂獨脫無依達本心

寶峰

乾坤一寶示形山歷劫巍然碧漢間  
指露當前非色相光吞萬象自悠閒

屏嶂

離披底趣妙通神廓落楮毫覲面陳  
執道風光如潑黛大悲手眼畫難真

紫叢

天上人間獨個尊  
人情稱指紫薇崙  
呈真象自顯今  
古惟亘寰中作主元

獅子

距爪張牙口半開  
驚羣曾是戲毬來  
吒沙奮迅威凜  
惡跳躍身騰吼似雷

香爐

繫鼎單絲久亦如  
靈山火種不傳虛  
煖灰須是兒孫  
續代代聯芳總嗣渠

佛座

特爾無依聊指座  
蓦然識此皎靈源  
摩挲歷的超空

有據本分明不涉言

羅漢

了悟無復後有身孤峰獨坐現前人娑婆界內多方  
供不動脚根普應真

鉢盂

佛祖傳來一口鉢山河大地吸皆空人天欲睹如何  
狀指出危巔見鉢容

天柱

天柱峰高高亦尊大千咸小不須論我來獨跨峰頭  
上盡十方中一口鉢

五雲

五種雲從何處來一時湊合惹人猜爭如坐斷迷雲路脫體無垠正眼開

報雨

峰頭一片微雲起報道天官雨下來雲旣無心能管應無心消息亦奇哉

吉祥

風光本有瑞騰空光擣根元只此中返照窮初者個地靈明亘溢絕朦朧

寶峰

隱元琦

無價奇珍疊滿山流輝千古濟人間試拈白棒當頭  
指大地貧兒盡改顏

屏嶂

屏巒羅列展家風面面花開間白紅却有水雲多意  
氣每來點綴翠微中

紫薇

一支秀接紫薇宮遍體文章積翠絨尊貴由來堪作  
主千峰朝拱碧雲籠

獅子

殘雲斂盡露全身氣宇昂昂孰敢親獨踞巖風千里



外未曾哮吼也驚人

香爐

卓立渾成一柄長千年冷燄豈尋常無端落在渠儂  
手撥着些兒過界香

佛座

天爲寶蓋地爲蓮一座巍巍永不遷日耀玲瓏金相  
好靈山黃老尚依然

羅漢

烟收嶽面貌峻嶒兀兀如癡百不能木落秋清貧徹  
骨陡然富貴彩雲凝

鉢盂

碧岫雲囊半掩濃儼然寶鉢托虛空一聲霹靂轟天  
地鉢底掀翻幾臥龍

天柱

奇哉一脉露機先刺破渾淪獨峭然不爲羣嶺爭秀  
氣生成骨格要撐天

五雲

那邊欲露真消息個裡分明要舉揚倏忽峰頭懸五  
彩林巒澗壑盡生光

報雨

傾湫倒嶽事尋常何獨峰愁如夢鄉一滴未曾沾大地片雲拖出舌頭長

吉祥

氤氲瑞氣結浮圖一道祥光削處孤特地山川俱顯煥看來好事不如無

荅邑侯禱雨之請

抱病寒巖待晚晴全賢侯何事騫勾牽頭陀非是人間物移向人間不值錢

東縣主凌公

颯颯江風徹夜呼捫心靡愧是良圖寒潭皎月空撈

攬到底分明一物無

其二

護藏僧徒困役迷龍樓簫索野狐啼檀那若負瞿曇  
嚙何處青山不可棲

寄外護諸居士

萬里迢迢降玉音每開黃卷細沉吟名賢叟叟隨情  
轉千古何人簡帝心

其二

江風四起震龍樓烟鎖青山一帶愁幸遇諸公各出

千皇恩祖意一時到

重興大殿

跨海非常木撐天必大材東君如有意吹入我門來  
豎中天師祖壇院

功成喜得念初堅骨露孤峰獨峭然忤逆兒孫親蓋  
覆一輪杲日正中天

丙戌回山之作

一別寒巖閱兩春五湖佳景眼中塵佛恩奚啻丘山  
重世事渾無半點真雪髯難忘親勅賜青山豈昧舊  
時人故園松竹依然在待得余歸翠又新

小溪十咏

一枕倦雲幾片夢。回鳥噪山堂。携杖尋流洗耳。溪陰  
肝膽俱涼。

其二

水靜鬚眉可鑑。心空身世皆忘。坐臥一溪環繞。不知  
幾變滄桑。

其三

偶爾尋幽適意。追叅雲水茫茫。猿鳥也知樂趣。啣花  
各獻溪傍。

其四

靜處爭如養德。達名不若翫光。盡道溪山可隱。誰知

天下無藏

其五

去年此際遊。今日重新舉。揚山色。人情仍舊自然。  
吹水成章。

其六

構着源頭一壩。始知正脉流長。黃檗尋常苦口。舌翻  
四海汪洋。

其七

量大自然納垢。德全必也包荒。雲倦愛予癡懶。天豪  
豈責吟狂。

其八

送客一溪流水接人幾片閒雲去住無拘無束何妨  
分而不分

其九

若不親師擇友焉知目擊道存一種平懷無寄炎涼  
何處躲蹤

其十

洞口呵雲作迹峰頭捧月成痕不若橫眠一榻任他  
地黑天昏



摩霄絕巘跨靈淵神蟄翻騰信得先瞥爾微雲通一  
線千林萬壑盡傾瀦

羅漢峰

玄客定

謾將大地作蒲團坐斷千峰竟日間滿面風光彌宇  
宙不曾持鉢到人間

香爐

中柱砥

展出精奇本自然渾淪卓立冷含烟分明一段難藏  
隱撥着氤氲徧大千

觀龍潭

木菴瑄

午後風清澹翠微溪山何處不幽奇嵯峨雨徑苔痕

滑嶮峻藤崖日影遲萬丈寒潭藏碧落一條瀑布散  
瓊枝引他無限奇男子來去紛紛着眼窺

羅漢

卽非一

寸絲不掛若癡懸仁界翻爲一小菴坐久那知天地  
老禪心竟日照寒潭

鉢盂

誰將一口托虛空半貯寒烟半貯風莫是老僧收拾  
懶長年安置白雲中

獅子

出窟全毛氣傲豪長將日月戲爲迷有時忽震風雷

舌一吼聲聞億萬州

小溪咏有引

時學鑒

和尚小溪卧咏遠近傳誦所謂遊觀皆足見道  
束施不能效顰者也鑒時從溯流步韻即可非  
敢附驥不朽亦以自述追隨云爾

老來身世俱休。徘徊已絕馳求。坐依石屏半幅。渴飲  
一帶潺流。

豈必寢石方休。適趣何用多求。數點鳩聲喚雨。一行  
魚影逐流。

記持了知無益。安眠更不圖求。葉落推回午夢。眼開

方覺新秋

不學雀巢灌頂寄身翠壁清流  
葛灑曹溪一滴菁潤  
萬國九洲

倦來盤石可臥興至曲澗堪遊  
新蕙香浮谷滿枯枝  
旋拾烹流

岸花零落誰取溪雲去住何求  
可憐一般水鳥終日  
流囀無休

尋幽不厭深澗溪小適意便休  
烈日迎風却暑就涼  
枕石聽流

自從得那些子迥然脫灑林丘  
卷之退藏於密放則

度亦奔流

同友人觀龍潭

興慈

策杖尋溪入迂迴灌莽中耳清聲漱玉衣濕沫從風  
盡浣峰腰翠遙拖日脚紅花飛金粟界簾下水晶宮  
出峽流還駛延崖路忽通練光山晝夜人語澗西東  
數里歸猶緩終朝興未窮回看行坐處法雨遍晴空

懷中天師

陸世首

當年杖錫去悠悠蕪水隄山萬里秋法雨沾濡千世  
界宗風浩蕩遍神州巢雲古洞看誰主掛壁飛泉只  
自流且向祇園高枕卧天書有日到林丘

其二

年去年來秋又分  
山中作伴只烟雲  
談禪恐破天魔膽  
說法曾驚鹿豕羣  
月落敲鐘林際曉  
窓虛流水枕邊聞  
征鴻千里無書至  
翹首長空看斗文

其三

十二峰頭瀑布飛  
天風吹下薜蘿衣  
九重日月長繩繫  
衆壑烟霞滿袖歸  
詩咏樓前黃鶴舞  
心遲薊北白雲違  
道人不耐京塵苦  
好向崗頭共採薇

其四

草屨遙從入剡門  
白雲猶自繞祇園  
幾宵遠夢驚鐘

喚一片幽懷與鶴論  
窓外人稀塵不到潭中  
珠映水無痕  
床頭長有琴書在  
閉戶誰知日月奔

遊龍潭分得宮字

峭壁凌層遠接空  
自然不假五丁工  
鮫珠倒瀉簾垂雨  
馬鬣高騫石嘯風  
溜激雷聲分鷺嶺  
樹含霜色過琳宮  
留連未覺千峰晚  
吟落殘陽一點紅

登藏經臺有感

子規聲裏嘆春歸  
草色青青落翠微  
昔日靈文何處在  
荒臺惟見鷓鴣飛

遊黃檗

海容

咫尺名山地無緣到此遊樓臺棲日月鐘鼓隱林丘  
洞鳥窺禪去巖雲度水流探奇須悟趣未得賞心儔

遊龍潭

隆瑞

秋仲探靈境神清爽氣新碧潭今古照洞徹本來真

天柱峰

隆璋

一柱孤高孰與齊亭亭遠際絕攀躋白雲影裡全身  
現撐住虛空不放低

遊石門

石門寂寂鎖青山雲冷溪頭屋半間倚午不知天是  
昔多年惟見水長潺湲巖花帶雨開猶落沙鳥親人去



復還寄語乘時名利客浮生萬事得如閒

佛座峰

性杲

不藉良工巧塑成天然一座儼分明從來殊相難思  
議爲度人間強得名

遊紫薇菴

廣微

一路巍然透紫葢秋風扶我錫如飛峰巒疊疊窺金  
樞花雨紛紛透翠衣自是境幽聞見杳况兼地峻往  
來稀清溪對客頻饒舌回首啼鴉帶日歸

遊水月菴

性政

草色携來兩袖青落花風定細堪聽有心蟾影寒相

照無意溪流湍自寧松裏鶴鳴因我靜門前御吼爲  
誰醒芒鞋却喜和雲健冷看鳬鷺戲綠萍

次文忠公韻

道岳

世路崎嶇成幾劫將笑語買時寬囊中久客黃金  
盡匣裏新劖白劍寒鴈鶩羣來烟水上鳳凰飛去紫  
雲端逢人但說無生話萬里荒丘不忍看

其二

日落霜飛長夜陰寒猿啼出遠嶽岑三年乳德空中  
斷十載皇恩夢裏尋衣破自縫愁落落雞鳴欲舞病  
沉沉茂弘有晉聲還在敢向同人題風心

遊萬松菴

性日

結伴尋幽興自酣  
春風處處散晴嵐  
山留石髮支高隱  
壑積松濤供老曇  
竹徑偶携剛是七  
虎谿頻笑亦仍三  
歸來藉有孤筇力  
回首巖西雲滿龕

遊獅子菴

憺從磬裏寄來真  
蒲眼烟霞入境新  
栢子菴前松作侶  
梅花塢上月宜人  
挹將千仞峰頭水  
浣盡三年衣上塵  
尤喜山家風味樸  
長留笋蕨供嘉賓

遊龍潭

捫蘿攀石越杉松  
遠叩澄潭老蜃龍  
瀑布疑懸千斛

淚梅花偶寫半山容  
繇來傲骨憑芒屨  
閒身伴竹筇  
題詠迹從今日掃  
姓名不欲掛羣峰

遊翠竹菴

萬綠深深裏  
小小居  
有時携蠟屐  
隨意訪蓬廬  
泉石能留偈  
烟雲每向渠  
春巢寒乳鵲  
嘉圃老腴蔬  
虎跡堦前善  
鐘聲林外疎  
臺承飼鳥飯  
案積乞花書  
坐茗香風遠  
行吟午夢餘  
以斯爲事業  
遂可侶樵漁  
塵境已長謝  
閒情復自如  
夕陽歸路晚  
蒼翠點衣裾

元日奉誦本師隱和尚雲濤集敬賦

寸心能幾石  
兩字別雲濤  
記得焚香處  
春山此日高

遊獅子巷

性幽

風搖獅卧吼雲低滿耳松濤濺鳥啼萬派穿山流上  
下羣峰掛日勢東西金家舊種苦根老鶴錫新開草  
徑迷獨踞茅椽威自猛遙看羅漢靜相携

遊水月巷

奇峰原不倩淞精小構談玄惹石聽月色凌空千嶂  
動水流入定一潭寧虫敲風句呼人寐楓醉霞觴爲  
我醒誰使幽心負芽芽鳥聲啼處冷浮萍

遊翠竹巷

新竹猶然戀故園一巷招月與高論誰將峰舌晴時

吐却把松濤雨後吞雞且有冠迎翰客鶴能無吸酒  
雲門聽猿三復黃州記談笑應令白日昏

遊萬松巷

冰心散作蒲山雪松嶂呼天却未難塔草何曾爲露  
茂籬花原不慙風殘凌空有餘誰能見拂地無枝且  
共看逸興肯隨日影逝翩翩蝶翅撲雞冠

遊龍潭

向日在天今在潭晶宮飽取不爲貪莫言長卧羞諸  
葛自是深藏學老聃玉鷺飛時鱗甲動珠簾垂處爪

千言請聖爲道行多露對此能無嘆息三

仙詩附

和小溪十咏

宋陳博

石意排來溪裡雲  
心懶向禪堂閒  
人不知有我亂施  
法雨悠涼

其二

翠點袈衣欲冷紅  
封蝶意將忙  
筇頭偶隨詩興  
草根獨染花傷

其三

水色無知笑客花  
魂不醉風光行  
徑且隨石路  
忽來問我行藏

其四

老翁不凝塵色。少年何處狂揚。晚來落日返照蓮歸。  
收拾文章。

其五

芳葉含凝秋色。野猿啼咲相忘。衆香來吞空谷。懶僧  
莫探麻桑。

其六

淡淡秋光未半。攸攸詩思還長。屐前野香謾吐竹外。  
溪影微泮。

其七



筆寒何嘗有辭硯老不辭無荒天將催人放晚客歸  
得意還狂

其八

不種人間喜色偏尋鶴跡閒雲水聲無腔自調月痕  
有意來分

其九

無碍峰頭自足林外相存花枝移來座上石榻  
虛設無蹤

其十

鐘聲偏來催我遊懷遙適無痕鳥啼山童不管乾坤

何處黃昏

別句

茗罷詩成暫別師  
杖頭月影上遲遲  
空山無迹吾來往  
異日相逢在火眉

紫雲洞寄隱和尚

何九真

也曾觀面法王前  
巖畔飛花二月天  
一吼可聾三日耳  
亂山何處石能眠

附逸事

附逸事者志奇也備考也因其備而考之烏乎  
奇卽有奇而志之亦政無容奇也凡物之可入  
者靈則後應事之可大者機必先兆千秋不易  
之理也而人多以爲奇者聞見寡耳然則風雷  
震號草木蓂榮獨非聞見之常乎倘從來無有  
是事一旦忽起于寰間寧不駭然共訝之以爲  
奇哉閱茲編者嘗作如是觀

古佛示瑞

共三尊銅身鐵座高有四尺鑄造不知何年月係

鎮東衛莊真南所施後因詔各處郡邑搜銅鑄錢  
時里耆報之柳邑遂令舁進藏于庫中以候解送  
未及一年庫中每放光衆驚疑以爲火發近視之  
則無有焉吳芳然曰此必古佛示瑞也廼啓庫  
發出舁還本寺今崇于藏經閣之下

靈湫顯異

黃檗在清遠里去縣治西南三十五里石壁峭立  
飛泉如瀑布循崖懸空而下渚爲雨潭遇旱禱雨  
輒應宋元符二年安撫程邁禱而應爲立麓堂宣  
和二年攝邑陳麟再立祠享熙元年安撫史浩復

增飭之制奉卽徐師仁爲之記獎之刻詩于石上  
有洵亭咸淳丙寅倉使劉震孫改名九淵第一夷  
堅志云黃檗在福清南三十八里山頂有龍潭從  
石穴間成一穴直下無底潭口濶可五丈寺僧曰  
此福德龍也常行雨歸多聞天樂或于雲霧中隱  
見盤花對舞泉州僧慶元聞而悅之與徒數十  
人至潭焚香禱且誦白傘真言願睹其狀先取  
楮鏹投水中卽有乍下引之者倏然而沒固已駭  
之矣時方白晝有黑雲如扇起頃之蔽空對面不  
相識徐徐睹一物起潭中類蓮花莖柄皆赤色繼

而雙眼如日耀采射人突起其上諸僧驚恠急奔下山雷雨已隨其後移時乃止其龍为亭及詩記今不復見

右載在縣志

巨蟒神踪

晉安逸志云唐僖宗時山有巨蟒爲崇邑人劉孫禮妹三娘姿色妖艷蟒攝入洞中爲妻孫禮不勝忿恚誓必死之遂棄家遠遊得遇異人授以驅雷祕法歸與蟒鬪是時其妹已生十一子孫禮殺其八妹奔出再拜爲蟒請命孫禮乃止後三子爲神

日九使十使卡一使閩中住立廟祀之今古詳

峰下亦有九使神宮

五音鑿石

狀似鱷魚叩有五音後值倭變物不復存焉

九龍古樹

距寺數百武值于甬道之右卽木橋下溪邊也唐  
黃明問巢丞入山鴻休師遇害于此事著前篇其  
樹約高八九丈蟠蟠屈曲勢若虬龍下垂九根于  
地突兀蒼古因號爲九龍樹今廢

鄭渚金聲

黃檗鄭渚田詳前嘉靖末其田復陷爲鹹鹵盡落

民間厥後鄉民輒修輒壞夜聞壞處往往有金鼓  
震擊之聲疑是本山迦藍所司

嵩岩香乳

佛座有嵩岩石罅晨出乳香于石罅間以手指捏之  
香經日不散

祥雲現瑞

萬曆戊申歲九日慶雲現于黃檗佛座峰林大啓  
詩有凝成五彩諸天麗之句甲寅秋夜復現于山  
之西爛熳如錦觀者不知何祥數日後聞請藏經  
命下矣林伯春作祥雲歌志喜歌曰



雲何祥兮綬西方兮瑞徵龍藏寵錫將兮山寺荒  
涼喜生光兮佛日輝煌永劫長兮又曰

綵雲爛兮橫檠山絢日光兮影塵寰明君賢相之  
所關太史瞻之動聖顏魏公勲業滿人間

戊子季夏望日師與客會拱橋忽然天際流輝仰  
而觀之五彩文明謂客曰此卿雲也斯日嘉會天  
有瑞氣之兆必有有禎祥之應因作歌志之曰  
陰陽調和兮瑞物生師資契會兮學業成中外一  
如今禪林振主賓唱和兮大道行慶雲爛綬兮瑞  
氣之所鍾佛日長懸兮吾皇之德明

春畦法雨

崇禎庚午季春廿七日農民方以旱魃爲虐田龜  
水涸焦逼無奈適客雲和尚飛錫南來到黎灣黑  
雲忽起大板田得畊插遠近共慶咸傳爲法  
雨云卓冠詩有妙雲欲覆涅槃海法雨先滋熱惱  
田之句

彩泥示現

壬午仲夏塑大佛將畢欲上細泥徧尋烏有一日  
驟雨狂發奔流異常午後雨止師溯流覽勝至藏  
角小澗處祥光映日細觀五彩之泥瑩潤可愛展

如粉末令佛師取之上三尊訖其泥隱矣大衆嘆  
奇師曰佛之福緣不可思議何奇之有囑侍者記  
之以曉將來

白光貫頂

壬午臘旦大佛功成佛師萬象先自入閩中以此  
功德大獲如意遂受菩薩圓滿大戒朝昏竭誠如  
法修懺至第八早入毘盧閣中忽見大殿頂上白  
毫光圓如蓋逾時乃散自慶弗勝入室白師師曰  
此是誠心所致感應道交白業已成戒法圓滿吾  
爲汝喜益見佛亦不汝欺也